

Headlines

- रक्षामंत्री राजनाथ सिंह होरें अंदरूनी ते बाहरली सुरक्षा चनोतिएं कन्नै असरदार ढंगै सिर निब्वडने लेई मजूदा समें साब्वे लोडचदिएं तैयारिएं दी जरूरतै पर जोर दित्ता ऐ।
- लेफ्टिनेंट गवर्नर मनोज होरें सार्वजनिक सेहत ते लोक कल्याण गी बढ़ावा देने लेई साफ-सफाई सरबन्धी अभियानें दे महत्वै पर लौऽ पाई ते आखेआ जे सामुदायिक भागीदारी दे कन्नै पक्क गै ग्राएं दी तस्वीर बदली जाई सकदी ऐ।
- विज्ञान ते टेकनालजी मंत्री डॉ. जितेंद्र सिंह होरें आखेआ ऐ जे जम्मू-कश्मीर च किश्तवाड़ जिला प्रधानमंत्री धन धान्य कृषि योजना तैहत अकांक्षी कृषि जिला चुनेआ गेआ ऐ।
- करीब 5 महीने तोड़ी प्रभावत रौहने दे बाद रियासी जिले च चनाहू दरेया पर राफ्टिंग दियां गतिविधियां परतियै बहाल होई गेइयां न।
- लोकें गी दिलै सरबन्धी बमारिएं बारै जागरूक बनाने, इंदी रोकथाम करने ते इन्दे असर गी उजागर करने दे मकसद कन्नै अज्ज दिलै सरबन्धी कुल संसारी ध्याडा मनाया जा'रदा ऐ।

<><><><><><>

DM Security Challenges

रक्षामंत्री राजनाथ सिंह होरें अंदरूनी ते बाहरली सुरक्षा चनोतिएं कन्नै असरदार ढंगै सिर निब्वडने लेई मजूदा समें साब्वे लोडचदिएं तैयारिएं दी जरूरतै पर जोर दित्ता ऐ। अज्ज नमी दिल्ली च भारत तटरक्षक बल दे कमांडरें दी बैठक गी संबोधित करदे होई रक्षा मंत्री होरें आखेआ जे रक्षाबलें गी कुसै बी चाल्ली दी रक्षा चनौती कन्नै निब्वडने लेई हर बेल्ले ते पूरी चाल्ली तैयार रौहना लोडचदा चेचा करियै अज्जै दे दौर च पैदा होने आहिलियें नित नमी किस्मै दिएं चुनौतिएं ते खतरें कन्नै असरदार ढंगै सिर निब्वडने लेई। उनें आखेआ जे मजूदा समें च चुनौतियां हर रोज इक नमें ते बक्खरे रूप च पेश औंदियां न जिंदा मकाबला कामयाबी सिर करने लेई अपने आपै गी उससै साब्वे कन्नोकन्नी तैयार करदे रौहना बड़ा लाजमी ऐ ना छड़ज पराने तौर-तरीकें पर गै निर्भर रौहना। उनें इक दुए कन्नै नेडमें तालमेल आहली इंटेग्रेट आटोमेटिड रेस्पांस बवस्था पर जोर दित्ता। रक्षा मंत्री होरें आखेआ इलैक्ट्रानिक थेआर मजूदा समें दी जमीनी हकीकत बनी चुके देन।

<><><><><><>

LG-Seva Parv

लेफ्टिनेंट गवर्नर मनोज सिन्हा होरें ग्रामीण विकास ते पंचैती राज विभाग आसेआ अज्ज जम्मू च 'सेवा पर्व'दे तैहत आयोजित कीते गेदे 'स्वच्छता विजय उत्सव' हिस्सा लैता ते कार्यक्रमै गी संबोधित बी कीता। इस मौके पर एल.जी होरें जम्मू-कश्मीर दे ग्रामीण ते शैहरी इलाकें बश्कार बित्थ पुरने लेई अपने प्रशासन दी बचनबद्धता गी फही पक्का कीता। उनें आखेआ जे इस भेठा केंद्र सरकार दी बचनबद्धता गी जम्मू-कश्मीर च पिछले 5एं, 6एं बरें दरान कीते गेदे कम्में दे लिहाज कन्नै खरी चाल्ली समझेआ जाई सकदा ऐ। एल.जी होरें सार्वजनिक सेहत ते लोक कल्याण गी बढ़ावा देने लेई साफ-सफाई सरबन्धी अभियानें दे महत्वै पर लौऽ पाई ते आखेआ जे सामुदायिक भागीदारी दे कन्नै पक्क गै ग्राएं दी तस्वीर बदली जाई सकदी ऐ।

<><><><><><>

Seva Parv. Railway

सेवा पर्व आहली विशेष श्रृंखला दे तैहत अज्ज अस गल्ल करने आं जे किस चाल्ली मोदी सरकार दिएं रेलवे गी आधुनिक सुधारें राएं आओजाई दा इक बेहतरिन सस्ता ते सुविधाजनक माध्यम बनाया जा'रदा ऐ। रेलवे च कीते गेदे ढांचागत सुधारें, सुरक्षा बवस्थाएं च बाढ़े, यात्रिएं दी सुविधा दे खास इंतजामें, भारत दी जीवन रेखा खोआने आहली रेल सेवा गी यात्रिएं दी पैहली पसिंद बनाई दित्ते दा ऐ। पिछले इक दाहके दरान मुख्य भरै च रेल पटरिएं दा बड्डे पैमाने पर सुधार कीता गेया ऐ जेदी बदौलत एहू मुलखै दी प्रगति ते खुशहाली दा पावरहाउस साबत होआ'रदा ऐं कश्मीर कोला लेइयै कन्याकुमारी तगर रेलवे देश दे इक

कोने गी दुए खीरले कोने तोड़ी जोड़ने आहले मजबूत सूत्र दा कम्म करा'रदी ऐ। सरकारै अमृत भारत ट्रेन दे नमो भारत रैपिड रेल नै रेल दे सफर गी मता सुरक्षित ते अरामदेह बनाई दित्ते दा ऐ। नमी शुरू कीती गेदी अमृत भारत एक्सप्रेस बारै इक यात्री शशिका त्रिपाठी दा आखना ऐ जे रेल गड़ी च उपलब्ध आधुनिक सेवा सुविधा सञ्चै गै सराहनेजोग ऐ।

<><><><><><>

Seva Parv Awareness Camp (byte)

उधमपुर दे एसिस्टेंट लेबर कमिशनर हुं'दे दफ्तर आसेआ अज्ज लेबर सराय उधमपुर च 'सेवा पर्व' दे तैहत इक्क बड्डे जागरूता ते पंजीकरण कैंप दा आयोजन कीता गेआ। जम्मू डिविजन दे डिप्टी लेबर कमिशनर सुखपाल सिंह होर कार्यक्रम दे मुख परौहने हे। इस मौके पर निर्माण ते गैर संगठित खेत्तर दे कम्मकारें दे पंजीकरण दे कन्नोकन्नी उ'नेंगी कल्याणकारी योजनाएं, समाजी सुरक्षा ते माली समावेशन आहली योजनाएं बारै जागरूक बनाया गेआ ते मौके पर गै जानकारीयें सरबन्धी सामग्री बी बंडुी गेई। खरी मती गिनतरी च निर्माण ते गैर संगठित खेत्तर दे कम्मगारें सने महिला आप सहायता समूहें दी सदस्यें ते नौजवानें ते आम लोकें बी इस कार्यक्रमै च हिस्सा लैता। इस मौके पर बोलदे होई जम्मू डिविजन दे डिप्टी लेबर कमिशनर सुखपाल सिंह होरें आखेआ

<><><><><><>

GST-Reforms Health Care

सरकार आसेआ जंदी 22 सितंबर थमां लागू कीते गेदे अगली पीढ़ी दे जीएसटी सुधार सेहत दिक्खभाल आहले खेत्तर च कई चीजें-बस्तें पर टैक्स दिएं दरें च कमी आहिनए आम लोकें गी बड़ी मती राहत उपलब्ध करवा करदे न। सरकारै कैंसर सने होरनें जानलेवा बमारिएं ते ईलाज लेई इस्तेमाल होने आहली 36 जीवन रक्षा दवाइयें पर टैक्स खत्म करी दित्ता ऐ। एहदे अलावा सरकार नै जरूरी दवाइयें ते मेडिकल उपकरणें जि'यां निदान किटें, ग्लूकोमीटरें ते थर्मामीटरें बगैरा पर जीएसटी दी दर गी 12 फीसद शा घटाइयै 5 फीसद करी दित्ते दा ऐ। एहदे कन्नोकन्नी सरकार नै सेहत ते जीवन बीमा प्रीमियमें पर जीएसटी दी दर गी 18 फीसद दे बजाय हुन पूरी चाल्ली खत्म करने दा फैसला बी लैते दा ऐ। इस गैंऽ कन्नै होर मते परौआर बीमा खरीदने लेई प्रोत्साहित होडन। इस सरबन्धै च प्रयागराज थमां डॉ. मोनिका हुं'दा आखना ऐ

<><><><><><>

Jitender-Aspirational

विज्ञान ते टेकनालजी मंत्री डॉ. जितेंद्र सिंह होरें आखेआ ऐ जे जम्मू-कश्मीर च किश्तवाड़ जिला प्रधानमंत्री धन धान्य कृषि योजना तैहत अकांक्षी कृषि जिला चुनेआ गेआ ऐ। इक सोशल मीडिया पोस्ट च डॉ. सिंह होरें आखेआ जे एहदे नै जिले दे दूर-दरेडे इलाकें च कृषि उद्यमता गी बढ़ावा थ्होग। उनें आखेआ जे सरकारै आसेआ 100 अकांक्षी जिले विकसित करने दी घोशणा 2025-26 दे केंद्री बजट च कीती गेदी ऐ।

<><><><><><>

Water-Rafting

मई म्हीने चले दे आप्रेशन सिंदूर ते मगरा बरखें ते हाड़ें दे चलदे करीब 5 म्हीने तोड़ी प्रभावत रौहने दे बाद रियासी जिले च चनाहू दरेया पर राफ्टिंग दियां गतिविधियां परतियै बहाल होई गेइयां न। आकाशवाणी दे जम्मू संवाददाता नै जानकारी दिती ऐ जे रिवर राफ्टिंग दे परतियै शुरू होने कन्नै सैलानिएं दे कन्नोकन्नी, साहसिक खेड्डें दे शौकीन ते सैलसफा कन्नै जुडे दे लोक ते मकामी टूर आपरेटर बी खुश न। रियासी पुज्जने आहले कई सैलानिएं एहदे पर अपनी खुशी प्रगट कीती ऐ। इस बारै आकाशवाणी कन्नै गल्ल करदे होई किश सैलानिएं आखेआ।

<><><><><><>

World Heart Day

अज्ज दिलै सरबन्धी कुल संसारी ध्याडा ऐ। लोकें गी दिलै सरबन्धी बमारिएं बारै जागरूक बनाने, इंदी रोकथाम करने ते इन्दे असर गी उजागर करने दे मकसद कन्नै एह ध्याडा हर बरे 29 सितंबर गी मनाया जंदा ऐ। सोशल मीडिया दी इक पोस्ट च केंद्री सेहत मंत्री जे.पी नड्डा होरें आखेआ ऐ जे दिलै सरबन्धी कुल संसारी ध्याडा दिल दिएं बमारिएं शा बचाऽ आहले हीले ते एक्कड़ी बमारिएं दी रोकथाम दी महत्वै उप्पर लौऽ पांदा ऐ। उनें आखेआ जे एह ध्याडा सत्तदार खुराक, नियमित कसरत ते

तनाव प्रबंधन दे राहें इक मजबूत ते सेहतमंद दिल बारै जागरूकता पैदा करने दा इक महत्वपूर्ण मंच बी उपलब्ध करोआंदा ऐ।
नट्टा होरें आखेआ जे सेहतमंद जीवनशैली गी अपनाइयै दिल दिएं बमारिएं दे जौखिम गी घट्ट करी सकदे न।

<><><><><><>

Sheep Husbandary

सरकार आसेआ करसानें ते भिड्डु चालकें दी भलाई-बेहतरी लेई रामबन जिले च मैहकमा भिड्डु पालन बड्डे पैमाने पर जागरूकता अभियान चला करदा ऐ। इनें कैपें दी मंशा भिड्डु पालन दे कम्मै च लग्गे दे लोकें गी बड्डे पैमाने पर जागरूक करना, भिड्डु दी नसल सुधार, उन्दे लेई डाक्टरी सेवा ते संगठित भिड्डु विकास योजना जनेइएं स्कीमें दी असरदार अमलावरी गी यकीनी बनाना ऐ तां जे उंदा मते थमां मता लाहू भिड्डु पालक हासल करियै अपनी औंदन बधाई सकन ते इक बेहतर जीन हीने दा काबल बनी सकन। इस चाल्ली दिएं गतिविधिएं दा सरिस्ते ब्लाक, तहसील ते जिला सतह पर बी कराया जंदा ऐ जिंदे च भिड्डु दे कन्नोकन्नी सरबंधित दुए मैहकमे बी हिस्सा लैंदे न। इस बारे च आकाशवाणी समाचार कन्नै गल्ल करदे होई जिला भिड्डु पालन अफसर डॉ. शबीर अहमद खान होरें आखेआ।

<><><><><><>